

## Neva scomenzadives del Comun general de Fascia

L'ent fascian à metù a jir doi projec che vèrda soraldut ai joegn che é envié a portèr dant sia tesi de laurea e sia idees per Fascia

Projec - L. Comun general de Fascia é vegnù fora con doi neves de gran enteress, soraldut per i joegn de Fascia. Doi projec amò da descörir ti detaes, ma che pel esser de utol per chi che à voa de se meter a la proa e de portèr te val vèlch da nef.

L. prum à inom "N pest per nesc studenc" e l'é out ai studenc universitèr: per poder avenjer chest pest ge vel fèr ruèr te Comun general na tesi d'università scrita ti ultimes 5 egn te vigni setor de studie sun n argument che revèrda la val de Fascia. "Volon stimolèr i joegn a portèr inant lurieres de tesi che vèrde a la val o che, a vèlch vida, les posse esser utoles al

Comun general - disc l'assessor a la politiches di joegn Matteo Iori - e chest no demò vardan al davegnir, ma ence con n eie al passà, chierian de tor sù materièl che é jà stat scrit". Chi che volessa se enscruèr con sia tesi, i cogn l fèr dant che sie fora i 6 de november.

L. secondo projet metù a jir l'à inom "Idees per Fascia" e descheche se pel entener per tor pèrt ge vel aer n'idea. Te che setor? Chest an te chel economich-turistich. Pel esser na App da svilupèr, per ejempie, o n auter projet de vigni sort. L. concurs se serarà ai 30 de november e chi che avenc pel ciapèr n pest che rua fin ai 1000 euro.



L. Conseier de procura Matteo Iori.

Ma de bela neves pel ruèr ence per i etres partezipanc: "Volassane didèr i jogn a vegnir fora con vèlch bela proponeta, soraldut che revèrda la tecnologia. Noscia idea l'é che ogne an vegne mudà l setor. Chel che avenc, portan dant l'idea che ne pèr de maor enteress, ciaparà n bel pest, ma l'autra proponetes no vegnarà trates demez. Volon stimèr duc i projec che rua e proaron a sostegnir l maor numer de idees, dajan na man a les svilupèr, ence economicamenter o desche ent-partner", disc amò Matteo Iori.

Na ocasion per duc donca. Con pech se pel fèr n muie. Projec ouc a didèr i joegn, ma ence utoi a la

istituzion fascèna per aer na colaborazion da la comunanza e ruèr coscita, chest se spera, a arjonjer de bie travers.

Anchecondi, te noscia sozietà scialdi più tecnologica e complichèda, la più picola idea pel se mudèr te n suzess emportant. L. Comun general vel spenjer de chest vers, donca duc se arme de creatività e i se fae inant. Per informazions se pel scriver na mail a [segreteria@comungeneraldefascia.tn.it](mailto:segreteria@comungeneraldefascia.tn.it) o chiamèr l Conseier de procura Matteo Iori al 349.4390720.

Daniele Verra